



ევროკავშირი  
საქართველოსთვის  
The European Union for Georgia



## 2021 წლის მუნიციპალური არჩევნების მედიაში გაშუქების კვლევა

### რადიოარხების საინფორმაციო გამოშვებების მონიტორინგი შემაჯამებელი ანგარიში

5 ივლისი - 14 ნოემბერი, 2021



INTERNEWS  
GEORGIA

წინამდებარე ანგარიში მომზადებულია ევროკავშირისა (EU) და გაეროს განვითარების პროგრამის (UNDP) ხელშეწყობით. მის შინაარსზე პასუხისმგებელი არიან ავტორები. ანგარიშის შინაარსი შეიძლება არ ასახავდეს ევროკავშირისა (EU) და გაეროს განვითარების პროგრამის (UNDP) პოზიციას.

## სარჩევი

პროექტის შესახებ .....	3
მონიტორინგის მეთოდოლოგია .....	3
რადიოარხების მონიტორინგის ძირითადი შედეგები: .....	4
„საქართველოს რადიო“ (საზოგადოებრივი მაუწყებელი) .....	6
რადიო „მაესტრო“ .....	8
„პირველი რადიო“ .....	11
რადიო „პალიტრა“ .....	13
რადიო „იმედი“ .....	15
რადიო „ფორტუნა“ .....	17
რადიო „ჭერეთი“ .....	19
რადიო „სამხრეთის კარიბჭე“ (ქ. ახალციხე) .....	21
რადიო „მარნეული“ .....	23
რადიო „ათინათი“ (ქ. ზუგდიდი) .....	25
რადიო „ძველი ქალაქი“ (ქ. ქუთაისი) .....	27

## პროექტის შესახებ

„ინტერნუსი-საქართველო“, ევროკავშირისა და გაეროს განვითარების პროგრამის მიერ დაფინანსებული პროექტის - „2021 წლის მუნიციპალური არჩევნების მედიაში გაშუქების კვლევა“- ფარგლებში, რადიომაუწყებლების სადამოს საინფორმაციო გამოშვებებს აკვირდებოდა. მონიტორინგი 2021 წლის 5 ივლისს დაიწყო და 14 ნოემბრის ჩათვლით გაგრძელდა - მოიცავდა როგორც წინასაარჩევნო, არჩევნების პირველი (2 ოქტომბერი) და მეორე (30 ოქტომბერი) ტურის, ასევე არჩევნების შემდგომ პერიოდებს.

დაკვირვება 12 რადიომაუწყებლის საინფორმაციო გადაცემებზე უნდა განხორციელებულიყო, მაგრამ, რადგან რადიო „ვეის“ (ახმეტის რაიონი, პანკისის ხეობა, სოფ. დუისი) კვლევის პერიოდში საინფორმაციო გამოშვებები არ მოუშადა, მონიტორინგი 11 რადიოარხის სადამოს საინფორმაციო გამოშვებებს შეეხო. ეს რადიოებია: „საქართველოს რადიო“ (საზოგადოებრივი მაუწყებელი), „იმედი“, „მეესტრო“, „პალიტრა“, „პირველი რადიო“, „ფორტუნა“, „ჰერეთი“, „მარნეული“, „ძველი ქალაქი“ (ქ. ქუთაისი), „სამხრეთის კარიბჭე“ (ქ. ახალციხე), „ათინათი“ (ქ. ზუგდიდი).

## მონიტორინგის მეთოდოლოგია

რადიოარხების სადამოს საინფორმაციო გამოშვებების მონიტორინგის მიზანი იმის განსაზღვრა იყო, თუ რამდენად სამართლიანად, თანაბარ პირობებში და ჟურნალისტური სტანდარტების დაცვით ხდებოდა წინასაარჩევნო პერიოდში პოლიტიკური სუბიექტების საქმიანობის გაშუქება.

მონიტორინგი შედგება რაოდენობრივი და თვისებრივი კვლევის კომპონენტებისგან. რაოდენობრივი მონიტორინგი განსაზღვრავს ისეთ ინდიკატორებს, რომლებიც შეიძლება დაითვალოს და გაიზომოს: სუბიექტებისთვის დათმობილი დრო, გაშუქების ტონი (დადებითი, ნეიტრალური, უარყოფითი), პირდაპირი/ირიბი გაშუქება (სუბიექტები თავად საუბრობენ, თუ მათზე სხვები საუბრობენ), სუბიექტის სქესი (კაცი თუ ქალი).

თვისებრივი მონიტორინგისას ყურადღება ექცევა ისეთ მაჩვენებლებს, რომელთა რაოდენობრივად გაზომვა რთულია: ფაქტების დროული გაშუქება, ინფორმაციის დამახინჯება, დაუბალანსებელი გაშუქება, ტენდენციურობა, ფაქტებზე დაფუძნებული გაშუქება, ინფორმაციის წყაროთა მრავალფეროვნება, ხმით/მუსიკით მანიპულირება, ეთიკური ან პროფესიული სტანდარტების დაცვა, აგრეთვე ნებისმიერი ისეთი ფაქტი, რომელიც მნიშვნელოვანია ინფორმაციის ხარისხის წარმოსადგენად.

მონიტორინგის დროს დაკვირვება ხდებოდა პარტიებზე და პოლიტიკოსებზე, რომლებიც 2021 წლის მუნიციპალურ არჩევნებში მონაწილეობდნენ. მონიტორინგის სუბიექტები ასევე

იყვნენ: მთავრობა (ცენტრალური, ადგილობრივი, აჭარის), პრეზიდენტი, ბიძინა ივანიშვილი და მიხეილ სააკაშვილი.

დაკვირვება ხორციელდებოდა არა მხოლოდ საარჩევნო თემაზე მომზადებულ სიუჟეტებზე, არამედ ყველა სიუჟეტზე, სადაც მონიტორინგის სუბიექტებზე იყო საუბარი.

ანგარიში მოიცავს 5 ივლისიდან 14 ნოემბრის ჩათვლით პერიოდის სადამოს საინფორმაციო გამოშვებების მონიტორინგის შედეგებს.

## 5 ივლისი - 14 ნოემბრის პერიოდში რადიოარხების მონიტორინგმა შემდეგი შედეგები გამოავლინა:

- 2021 წლის მონიტორინგის შედეგები გვიჩვენებს, რომ რადიომუწყებლების უმეტესობა არც ერთი პოლიტიკური ძალის მიმართ მკვეთრად მიკერძოებულ დამოკიდებულებას არ გამოხატავდა. თუმცა, წინა წლებთან შედარებით, ახალ ამბებში გაიზარდა დაუბალანსებელი სიუჟეტების რიცხვი, სადაც ან უმეტესად ხელისუფლების პოზიციები შუქდებოდა ან - ოპოზიციის;
- რადიოარხებზე ნარჩუნდება დადებითი ტენდენცია, რომელიც პროფესიული ეთიკის სტანდარტების დაცვას ეხება. ჟურნალისტები სიძულვილის ენას არ იყენებენ, ეთერში არ ისმის სექსისტური, ჰომოფობიური, რომელიმე გენდერული ნიშნის მიმართ სიძულვილის ან საფრთხის შემცველი განცხადებები და არც ხმით / მუსიკით მანიპულირების შემთხვევები ფიქსირდება. ეს ყველაფერი პოლიტიკური პროცესების და წინასაარჩევნო კამპანიის გაშუქების დროს მნიშვნელოვანი ფაქტორია, თუმცა, ქვემოთ ჩამოთვლილი გამოწვევები იმდენად მწვავეა, რომ რადიომუწყებლების საინფორმაციო გადაცემები მაღალი ხარისხის სტანდარტებს კვლავაც ვერ აკმაყოფილებენ. დაძაბული პოლიტიკური ვითარებისა და პოლარიზაციის ფონზე, ის პრობლემები, რომლებიც 2020 წლის მონიტორინგის შედეგად გამოვლინდა, 2021 წელს კიდევ უფრო გამწვავდა - გადაცემების ხარისხი, უმეტესწილად, გაუარესებულია, ხოლო ახალი ამბების ზედაპირულად გაშუქება მოსახლეობის ინფორმირებულ არჩევანს ხელს ნაკლებად უწყობს;
- წინა წლებთან შედარებით, კიდევ უფრო თვალშისაცემი იყო ის ფაქტი, რომ რადიოარხები ერთმანეთთან კონკურენციას არ ცდილობდნენ - სხვადასხვა რადიოს საინფორმაციო გამოშვებებში ერთი და იგივე თემები ტრიალებდა და ნაკლებად ისმოდა ისეთი ინფორმაცია, რომელიც სხვა რადიოს ეთერში არ ხვდებოდა;

- წინა წლებთან შედარებით, რადიოების უმრავლესობაში მოიმატა ისეთი ახალი ამბების გაშუქებამ, რომლებიც მთლიანად ხელისუფლება - ოპოზიციის დაპირისპირებებზე იყო აგებული და ნაკლებად ჩანდა ჟურნალისტების მცდელობა, რომ პოლიტიკოსების დაპირისპირების მიღმაც მოეძებნათ და გაეშუქებინათ მოსახლეობისთვის აქტუალური თემები და ამით საინფორმაციო გამოშვებები უფრო მრავალფეროვანი გაეხადათ;
- რადიომუწყებლების პრობლემად კვლავაც რჩება ექსკლუზიური, სიდრმისეული და ანალიტიკური სიუჟეტების სიმწირე. ჟურნალისტები საკითხების განსხვავებული კუთხით წარმოჩენას, გაანალიზებას, ან ახალი პრობლემების წინა პლანზე წამოწევას ნაკლებად ცდილობდნენ;
- გასული წლების მონიტორინგის შედეგები გვიჩვენებდა, რომ ჟურნალისტებს წინასაარჩევნო პროგრამები და კანდიდატთა ხელვები (ასეთის არსებობის შემთხვევაშიც კი) მსმენელამდე სათანადოდ კრიტიკულად და სიდრმისეულად ვერ მიჰქონდათ. 2021 წელს ეს პრობლემა კიდევ უფრო გამწვავდა, რადგან კანდიდატთა ხელვების გაშუქება, პროგრამების შინაარსობრივი თუ შედარებითი განხილვა საერთოდ არ ყოფილა. მცირე დროით, მოკლედ და ზედაპირულად მხოლოდ კანდიდატთა მოსახლეობასთან შეხვედრები შუქდებოდა;
- მონიტორინგის დასაწყისში საინფორმაციო გამოშვებებში ძირითადი აქცენტი თუ კოვიდ-19-თან დაკავშირებულ სიახლეებსა და პოლიტიკური პარტიების დაპირისპირებებზე კეთდებოდა, ბოლო პერიოდში ექსპრზიდენტ მიხეილ სააკაშვილის პატიმრობამ ყველა სხვა თემა გადაფარა. ხშირ შემთხვევაში, საინფორმაციო გამოშვებებში სხვა არაფერი შუქდებოდა და ისედაც უყურადღებოდ დარჩენილი სოციალური პრობლემები, განათლება, ეკონომიკა, ეკოლოგია თუ თბილისის გარეთ არსებული გამოწვევები სულ უფრო ნაკლებად ხვდებოდა რადიომუწყებლების ინტერესის არეალში;
- რადიოარხებზე ანონიმურ და საეჭვო წყაროზე დაყრდნობით ახალ ამბები არ მომზადებულა, თუმცა პოლიტიკოსთა განცხადებები გადამოწმების გარეშე შუქდებოდა. ექსპერტულ შეფასებებს, კვლევებსა თუ სხვა სახის მონაცემებს დრო თითქმის არ ეთმობოდა - პოლიტიკოსები აკეთებდნენ ურთიერთსაწინააღმდეგო შეფასებებს, თუმცა ჟურნალისტები ვერ ახერხებდნენ, რომ მსმენელს სიმართლის დადგენაში დახმარებოდნენ;
- რადიოებში შენარჩუნდა 2020 წელს გამოკვეთილი ტენდენცია, როდესაც ახალი ამბების უმეტეს ნაწილს პოლიტიკოსთა საჯარო განცხადებების ჟურნალისტების მიერ ციტირება შეადგენდა. რადგან რადიო ინფორმაციას მხოლოდ ხმით გადმოსცემს, ნათქვამის უკეთ აღქმისთვის, მნიშვნელოვანია პირდაპირ საუბარს მეტი დრო დაეთმოს და მსმენელმა პოლიტიკოსების განცხადებები თუ მოსაზრებები უშუალოდ მათგან მოისმინოს. სუბიექტების, უმეტესად, ირიბად გაშუქება, გარკვეულწილად, იმაზეც მიუთითებს, რომ ჟურნალისტები საკითხებზე თავად ნაკლებად მუშაობდნენ და ხშირად მხოლოდ ოპოზიციური პარტიებისა თუ ხელისუფლების ოფიციალურად გავრცელებულ განცხადებებს, ან საინფორმაციო სააგენტოების ინფორმაციებს აჟღერებდნენ;

■ რეგიონული რადიომაუწყებლები რეგიონში მიმდინარე მოვლენების მაღალი სტანდარტებით გაშუქებას კვლავ ვერ ახერხებდნენ. ხშირ შემთხვევაში, საინფორმაციო გამოშვებებში აქცენტი თბილისში განვითარებულ მოვლენებზე კეთდებოდა. ადგილობრივი ახალი ამბების გაშუქების დროს ჟურნალისტები კრიტიკულ კითხვებს ნაკლებად სვამდნენ და პოლიტიკოსთა აქტივობებსა თუ განცხადებებს ანალიზისა და ფაქტების გადამოწმების გარეშე გადმოსცემდნენ. ამ მხრივ განსაკუთრებით პრობლემური ადგილობრივი ხელისუფლების გაშუქება იყო. რეგიონული რადიოების უმრავლესობაზე მათი აქტივობები და პროექტები მწვავე კითხვების ნაკლებობის, ზედაპირული გაშუქების გამო, ძირითადად, ნეიტრალურად და დადებითად წარმოჩინდებოდა. ადგილობრივი ხელისუფლების მიმართ კრიტიკულ დამოკიდებულებას განსაკუთრებული მნიშვნელობა სწორედ წინასაარჩევნო პერიოდში აქვს. რეგიონული მაუწყებლების პასიურობა განსაკუთრებული პრობლემაა იმ ფონზეც, როდესაც რეგიონში მიმდინარე მოვლენები არც ცენტრალური რადიოარხების ფოკუსში ექცევა. რეგიონულ რადიომაუწყებლებს შესაძლებლობა აქვთ, რომ თბილისს გარეთ განვითარებული მოვლენების გაშუქების კუთხით არსებული სიცარიელე შეავსონ - იყვნენ პირველები, ექსკლუზიურები და ამით საკუთარი რეგიონის, ქალაქისა თუ რაიონის პრობლემები წინა პლანზე წამოწიონ;

## „საქართველოს რადიო“ (საზოგადოებრივი მაუწყებელი)

„საქართველოს რადიოს“ მთავარ გამოწვევად ახალი ამბების მოკლედ და ზედაპირულად გაშუქება რჩება. საინფორმაციო გამოშვებები, ძირითადად, ოპონენტების მიერ ერთმანეთის საპასუხოდ გაკეთებულ განცხადებებზე იყო აგებული. გადაცემები თემების მრავალფეროვნებით არ გამოირჩეოდა, არ გვხვდებოდა ანალიზი, კრიტიკა და სიღრმისეული სიუჟეტები. ჟურნალისტები არ ცდილობდნენ ექსკლუზიური თემები გაეშუქებინათ და სხვა მაუწყებლებისგან განსხვავებული კონტენტი შეექმნათ, რაც საზოგადოებრივი მაუწყებლის მიზანი და ამბიცია უნდა იყოს.

მონიტორინგის ბოლო პერიოდს დაემთხვა ექსპრეზიდენტ მიხეილ სააკაშვილის დაკავება. მისი პატიმრობის თემამ ყველა დანარჩენი საკითხი გადაფარა. ისევე როგორც სხვა თემები, სააკაშვილის პატიმრობაც ზედაპირულად, თუმცა დაბალანსებულად შუქდებოდა. მსმენელს საშუალება ჰქონდა მოესმინა როგორც ხელისუფლების, ისე მათი ოპონენტებისა და უცხოელი პოლიტიკოსების შეფასებები.


საზოგადოებრივმა რადიომაუწყებელმა მონიტორინგის სუბიექტებს 9 საათი და 24 წუთი დაუთმო, საიდანაც ჯამში 46% მმართველი გუნდის და პარტიის გაშუქებაზე მოდის. მიუხედავად იმისა, რომ არც ერთი სუბიექტის დადებითად წარმოჩენის ტენდენცია არ

გამოვლენილა, ხელისუფლების აქტივობებსა და განცხადებებს ოპოზიციასთან შედარებით, არაპროპორციულად მეტი დრო ეთმობოდა.

### სუბიექტების გაშუქება (%)

"საქართველოს რადიო"

5 ივლისი - 14 ნოემბერი, 2021




„საქართველოს რადიომ“ პოლიტიკური სუბიექტები, მეტწილად, ნეიტრალურად გააშუქა. ჟურნალისტები ხელისუფლების წარმომადგენლების მიმართ მწვავე კითხვებს ნაკლებად სვამდნენ. შედეგად, მთავრობას დადებითად გაშუქების შედარებით მაღალი მაჩვენებელი დაუგროვდა, რაც, ამავე დროს, პრემიერ-მინისტრ ირაკლი ღარიბაშვილის განცხადებების პოზიტიურ კონტექსტში გაშუქებამაც განაპირობა. რაც შეეხება „ქართული ოცნებისთვის“ დაგროვილ უარყოფით ტონს (28%), ის არა კრიტიკული გაშუქების, არამედ ოპონენტთა განცხადებების ციტირების გამო დაგროვდა.

### სუბიექტების გაშუქება ტონის მიხედვით (%)

"საქართველოს რადიო"


5 ივლისი - 14 ნოემბერი, 2021



საზოგადოებრივი მაუწყებლის საინფორმაციო გამოშვების წამყვანები პოლიტიკოსთა განცხადებებსა თუ ურთიერთსაწინააღმდეგო ბრალდებებს თავად ციტირებდნენ - პოლიტიკურ სუბიექტებს პირდაპირი საუბრისთვის დრო არ ეთმობოდათ. პოლიტიკოსთა ნათქვამის უკეთ აღქმისთვის კი მნიშვნელოვანია მსმენელმა მათი განცხადებები და მოსაზრებები უშუალოდ მათგან მოისმინოს.

### სუბიექტების პირდაპირი/ირიბი გაშუქება(%)

"საქართველოს რადიო"  
5 ივლისი - 14 ნოემბერი, 2021



„საქართველოს რადიომ“ მსმენელს მაღალი ხარისხის ჟურნალისტური პროდუქტი ვერც 2021 წელს შესთავაზა. საზოგადოებრივი მაუწყებლის მიმართ არსებულ მაღალ მოლოდინებს მხოლოდ ჟურნალისტური ნორმებისა და ეთიკის საბაზისო სტანდარტების დაცვა ვერ აკმაყოფილებს. მნიშვნელოვანია, რომ მაუწყებელმა მრავალფეროვანი, ექსკლუზიური, კრიტიკული და ანალიტიკური ახალი ამბები მოამზადოს, სადაც პოლიტიკურთან ერთად მოსახლეობისთვის მნიშვნელოვანი სოციალური საკითხები, რეგიონების და სხვადასხვა მოწყვლადი ჯგუფის პრობლემები გაშუქდება.

## რადიო „მაესტრო“

რადიო „მაესტროს“ ვრცელ საინფორმაციო გამოშვებებში ქვეყანაში განვითარებული პოლიტიკური პროცესები აქტიურად, მაგრამ ზედაპირულად შუქდებოდა. მონიტორინგის ბოლო პერიოდში გადაცემების ქრონომეტრაჟი საგრძნობლად შემცირდა და ძირითადად ექსპრესიული მიხეილ სააკაშვილის დაპატიმრების ირგვლივ განვითარებული მოვლენები შუქდებოდა. ხშირ შემთხვევაში, ოპოზიციის საპროტესტო აქციები პირდაპირ ეთერში გადაიციმოდა და აქციაზე გამომსვლელი რამდენიმე პოლიტიკოსის ვრცელი მიმართვის გარდა საინფორმაციო გამოშვებებში სხვა თემა საერთოდ ვერ ხვდებოდა. მსმენელს არც იმის შესაძლებლობა ჰქონდა აქციაზე გაქვრებული მოსაზრებებისგან განსხვავებული ინფორმაცია მიეღო. ასევე შუქდებოდა მიხეილ სააკაშვილის პატიმრობის/შიმშილობის თემაც, რომელზეც მთლიანობაში გაშუქებული თემების 23% მოდის. ამ საკითხების გაშუქებისას ახალ ამბებს ბალანსი აკლდა, ვინაიდან ექსპრესიულების ადვოკატებისა და




„ერთიანი ნაციონალური მოძრაობის“ წევრების მმართველი გუნდის მიმართ გამოთქმულ მძიმე ბრალდებებზე ხელისუფლების წარმომადგენელთა საპასუხო კომენტარები იშვიათად ისმოდა. სხვა შემთხვევებში, საინფორმაციო გამოშვებები მთლიანობაში დაბალანსებული იყო, ჟურნალისტები რომელიმე პოლიტიკური ძალის მიმართ მიკერძოებულ, სუბიექტურ დამოკიდებულებას არ გამოხატავდნენ, თუმცა მათ მიმართ კრიტიკული კითხვების ნაკლებობაც იგრძნობოდა.

რადიომაუწყებელმა მონიტორინგის სუბიექტებს 21 საათი და 30 წუთი დაუთმო. აქედან ყველაზე მეტი დრო „ქართულ ოცნებას“ და მთავრობას (11 სთ. 34 წთ.) დაეთმო. „ერთიანი ნაციონალური მოძრაობას“ და მიხეილ სააკაშვილს კი ჯამში 4 საათი და 25 წუთი ერგო.

### სუბიექტების გაშუქება (%)

რადიო "მაესტრო"

5 ივლისი - 14 ნოემბერი, 2021




სუბიექტების გაშუქების ტონი, დიდწილად, ნეიტრალური იყო. თუმცა, „ერთიანი ნაციონალური მოძრაობის“ საპროტესტო აქციების პირდაპირ ეთერში გაშუქების გამო მმართველ გუნდს მაღალი უარყოფითი ტონი დაუგრძობდა.

### სუბიექტების გაშუქება ტონის მიხედვით (%)

რადიო "მაესტრო"

5 ივლისი - 14 ნოემბერი, 2021




რადიო „მაესტროს“ საინფორმაციო გამოშვებები, ძირითადად, პოლიტიკოსთა განცხადებებს ეფუძნებოდა. ჟურნალისტები პოლიტიკური პარტიების მიერ შემოთავაზებულ დღის წესრიგს მიჰყვებოდნენ და მოვლენები სიღრმისეულად ნაკლებად შუქდებოდა. მონიტორინგის პირველ ეტაპზე, ახალი ამბების გაშუქებისას პირდაპირი საუბრისთვის ეთერი ეთმობოდათ როგორც ხელისუფლების, ისე ოპოზიციის წარმომადგენლებს.

### სუბიექტების პირდაპირი/ირიბი გაშუქება(%)

რადიო "მაესტრო"

5 ივლისი - 14 ნოემბერი, 2021



მონიტორინგის ბოლო პერიოდში რადიო „მაესტროს“ საინფორმაციო გამოშვებები არც თემების მრავალფეროვნებით გამოირჩეოდა და არც ჟურნალისტის ნამუშევარი ჩანდა - არ მომზადებულა ექსკლუზიური, ანალიტიკური მასალები, რაც საინფორმაციო გამოშვებების ხარისხს მნიშვნელოვნად გაზრდიდა.

## „პირველი რადიო“


„პირველი რადიო“ მოვლენებს ვრცლად და კრიტიკული კუთხით აშუქებდა, თუმცა, ზოგჯერ, ცალკეული ახალი ამბავი დაუბალანსებელი იყო. ეთერში ჟურნალისტური სტანდარტების უხეში დარღვევის შემთხვევები არ დაფიქსირებულა. რადიომაუწყებელი თემების სიდრმისეული და ანალიტიკური გაშუქებით არ გამოირჩეოდა. წინა წლის მსგავსად, ჟურნალისტებს პროაქტიულობა ამჯერადაც აკლდათ და ექსკლუზიური მასალების მოძიებას ვერ ახერხებდნენ. საინფორმაციო გამოძვებები ფაქტების მშრალი გადმოცემით შემოიფარგლებოდა, ხოლო თემატიკა სხვა რადიომაუწყებლების მსგავსი იყო. მონიტორინგის ბოლო ეტაპზე აქაც, ისევე როგორც სხვა რადიოარხებზე, ყველა თემა ექსპრეზიდენტ მიხეილ სააკაშვილის პატიმრობამ (სულ გაშუქებული თემების 26%) გადაფარა.

მონიტორინგის სუბიექტებს 15 საათი და 11 წუთი დაეთმოთ, საიდანაც ჯამში 6 საათი და 43 წუთი „ქართული ოცნება“ და მთავრობა, ხოლო 6 საათი და 18 წუთი მიხეილ სააკაშვილი და „ერთიანი ნაციონალური მოძრაობა“ გაშუქდნენ.

### სუბიექტების გაშუქება (%)

"პირველი რადიო"


5 ივლისი - 14 ნოემბერი, 2021



რადიომაუწყებლის ეთერში ხელისუფლების მწვავე კრიტიკა ხშირად ისმოდა, თუმცა ზოგჯერ სიუჟეტები დაუბალანსებელი იყო, რადგან საპასუხო პოზიციები ნაკლებად გვხვდებოდა. ამიტომაც, მმართველი პარტია მკვეთრად ნეგატიურად (50%) გაშუქდა.

### სუბიექტების გაშუქება ტონის მიხედვით (%)

"პირველი რადიო"  
5 ივლისი - 14 ნოემბერი




„პირველმა რადიომ“ კრიტიკულად გააშუქა, როგორც წინასაარჩევნო, ასევე მეორე ტურის პერიოდში, თუმცა საინფორმაციო გამოშვებების თემატიკა, ამ შემთხვევაშიც, სხვა რადიომუშყეებლების მსგავსი იყო და ჟურნალისტების ნაკლებ პროაქტიულობაზე მიუთითებდა.

სუბიექტებს დროის, საშუალოდ, 52% პირდაპირი საუბრისთვის ეძლეოდათ. გამონაკლისს წარმოადგენდა „ქართული ოცნება“, რომლის გაშუქების 66% ირიბ საუბარზე მოდიოდა, რამაც, შესაბამისად, მმართველი პარტიის უარყოფითი ტონის გაზრდას შეუწყო ხელი.

### სუბიექტების პირდაპირი/ირიბი გაშუქება(%)

"პირველი რადიო"  
5 ივლისი - 14 ნოემბერი, 2021



მნიშვნელოვანია, რომ რადიომუშყეებელი ხელისუფლების საქმიანობის გაშუქებისას კრიტიკულ დამოკიდებულებას ინარჩუნებს, თუმცა ახალი ამბების ხარისხის გასაუმჯობესებლად საჭიროა, რომ ჟურნალისტებმა ბალანსის დაცვით იმუშაონ, მეტი დრო დაუთმონ დამატებითი მასალების მოპოვებას, ასევე ინფორმაციის ანალიზსა და დამუშავებას.

## რადიო „პალიტრა“

რადიო „პალიტრა“ მოვლენებს ვრცლად და დაბალანსებულად აშუქებდა. ჟურნალისტები ამა თუ იმ თემის ირგვლივ განსხვავებულ მოსაზრებებს წარმოაჩენდნენ - პოლიტიკოსებთან ერთად, არასამთავრობო სექტორისა და ექსპერტთა პოზიციებიც შუქდებოდა. თუმცა, რადიომთაყვებელს ექსკლუზიური სიუჟეტები და თემების მრავალფეროვნება აკლდა. ახალი ამბების თემატიკა სხვა რადიომთაყვებლების მსგავსი იყო: ჟურნალისტები ვერ ახერხებდნენ დღის აქტუალური საკითხების მიღმა, სხვა უყურადღებოდ დარჩენილი და სხვა მედიასაშუალებების მიერ მივიწყებული პრობლემების წინ წამოწვას.

რადიომთაყვებელი აქტიურად აშუქებდა, როგორც წინასაარჩევნო, ასევე არჩევნების დღესა და მეორე ტურის პერიოდის მოვლენებს. გამონაკლისი მხოლოდ აგვისტო იყო, როდესაც „პალიტრამ“ ფორმატი დროებით შეცვალა და საინფორმაციო გამოშვებების ხანგრძლივობა შემცირდა.


„პალიტრა“ საკითხებს ვრცლად და მიუკერძოებლად აშუქებდა. მათ შორის ექსპრეზიდენტ მიხეილ სააკაშვილის პატიმრობას, რომელიც ოქტომბერ-ნოემბრის ყველაზე გაშუქებადი (29%) თემა იყო.

რადიომთაყვებელმა მონიტორინგის სუბიექტებს 23 საათი დაუთმო. აქედან, ჯამში 7 საათი და 46 წუთი მიხეილ სააკაშვილსა და „ერთიან ნაციონალურ მოძრაობაზე“ მოდიოდა, ხოლო 9 საათი და 47 წუთი - მთავრობასა და „ქართულ ოცნებაზე“.

### სუბიექტების გაშუქება (%)

#### რადიო "პალიტრა"

5 ივლისი - 14 ნოემბერი, 2021




ახალი ამბები დაბალანსებული იყო და არც ერთი პოლიტიკური სუბიექტის მიმართ მიკერძოებული გაშუქების შემთხვევები არ დაფიქსირებულა. სუბიექტები, უმეტესად, ნეიტრალურ ტონში შუქდებოდნენ. რადიომსაუწყებელი კრიტიკულ დამოკიდებულებასაც ინარჩუნებდა და არც ხელისუფლების მიმართ გამოთქმული მწვავე შეფასებების გაშუქებას ვერიდებოდა, რის გამოც მმართველ პარტიას დროის 38% უარყოფით ტონში დაეთმო.

**სუბიექტების გაშუქება ტონის მიხედვით (%)**

რადიო "პალიტრა"

5 ივლისი - 14 ნოემბერი, 2021




პოლიტიკოსებს, საშუალოდ, 23% პირდაპირი საუბრისთვის ეთმობოდათ - მსმენელს საშუალება ჰქონდა მოესმინა როგორც მმართველი გუნდის, ასევე ოპოზიციის წარმომადგენელთა ხმები.

**სუბიექტების პირდაპირი/ირიბი გაშუქება(%)**

რადიო "პალიტრა"

5 ივლისი - 14 ნოემბერი, 2021



რადიო „პალიტრა“, რომელიც წლების განმავლობაში მიუკერძოებელი რადიოარხის სტატუსს ინარჩუნებს, არც ამჯერად დალატობდა პროფესიული ეთიკის სტანდარტებს და ინფორმაციულ, დაბალანსებული საინფორმაციო გამოშვებებს ამზადებდა. თუმცა, პრობლემად კვლავაც რჩება ანალიტიკური და ექსკლუზიური მასალების ნაკლებობა, რაც საინფორმაციო გამოშვებების ხარისხს მნიშვნელოვნად გაზრდიდა.

## რადიო „იმედი“

რადიო „იმედი“ ახალ ამბებს მოკლედ და ზედაპირულად აშუქებდა. საინფორმაციო გამოშვებებში ბალანსი „ქართული ოცნების“ სასარგებლოდ არაერთხელ დაირღვა, რადგან ხელისუფლება - ოპოზიციის დაპირისპირებებზე აგებული ახალი ამბები, უმეტესად მმართველი გუნდის პოზიციიდან იყო წარმოდგენილი - ჟურნალისტები ხელისუფლების კრიტიკას ერიდებოდნენ და ოპოზიციის მხრიდან მმართველი გუნდის მიმართ გამოთქმულ ნეგატიურ შეფასებებსაც დროს ნაკლებად უთმობდნენ, ან ოპოზიციონერების მწვავე განცხადებებს ისეთ კონტექსტში წარმოადგენდნენ, სადაც კრიტიკა შესუსტებული და ძალადაკარგული ჩანდა.


თემების მრავალფეროვნებით არც რადიო „იმედის“ საინფორმაციო გამოშვებები გამოირჩეოდა. თუმცა, ზოგჯერ, ეთერში ხვდებოდა ისეთ სიახლეები, რომლითაც სხვა რადიომუშყებლები არ ინტერესდებოდნენ. მაგალითად, მთავრობის ან კონკრეტული სამინისტროს აქტივობები, ინფორმაცია რომელიმე ინფრასტრუქტურული პროექტის განხორციელების შესახებ. ამ თემების გაშუქებისას მმართველი გუნდის წარმომადგენლები, უმეტესად, დადებით კონტექსტში შუქდებოდნენ.

რადიო „იმედმა“ მონიტორინგის სუბიექტებს 6 საათი და 27 წუთი დაუთმო. ამ დროის ჯამში 68% სახელისუფლებო გუნდის გაშუქებაზე მოდიოდა, ხოლო 19% - „ერთიან ნაციონალურ მოძრაობასა“ და მიხეილ სააკაშვილზე. ოქტომბერ-ნოემბერში ექსპრეზიდენტის პატიმრობა აქაც ერთ-ერთი ყველაზე გაშუქებადი (21%) თემა იყო.

### სუბიექტების გაშუქება (%)

რადიო "იმედი"

5 ივლისი - 14 ნოემბერი, 2021




სუბიექტები, საშუალოდ, 67% ნეიტრალურად გაშუქდნენ. თუმცა, „ერთიანი ნაციონალური მოძრაობისა“ და მიხეილ სააკაშვილისთვის დათმობილი დროის უმეტესი ნაწილი ნეგატიურ ტონზე მოდიოდა.

### სუბიექტების გაშუქება ტონის მიხედვით (%)

რადიო "იმედი"

5 ივლისი - 14 ნოემბერი, 2021




სუბიექტებს პირდაპირი საუბრისთვის დრო იშვიათად ეთმობოდათ. მათ განცხადებებს, მეტწილად, წამყვანი ციტირებდა. გამონაკლისს სახელისუფლებო გუნდი წარმოადგენდა, რაც ისევ და ისევ მათ დადებითად და ოპოზიციის უარყოფითად წარმოჩენას უწყობდა ხელს.

### სუბიექტების პირდაპირი/ირიბი გაშუქება(%)

რადიო "იმედი"

5 ივლისი - 14 ნოემბერი, 2021



მონიტორინგის შედეგებიდან გამომდინარე, რადიო „იმედის“ მიუკერძოებლობასთან დაკავშირებით საფუძვლიანი კითხვები ჩნდება. მნიშვნელოვანია, რომ „იმედის“ ჟურნალისტებმა დაიცვან ბალანსი, მმართველი გუნდის მიმართაც დასვან კრიტიკული კითხვები, მოამზადონ ანალიტიკური და სიღრმისეული მასალები, რათა მსმენელს მაღალი ხარისხის მედიაპროდუქტი შესთავაზონ.



## რადიო „ფორტუნა“


რადიო „ფორტუნა“ მოვლენებს დაბალანსებულად, თუმცა ზედაპირულად აშუქებდა. გასულ წლებთან შედარებით, არხის საინფორმაციო გამოშვებების ქრონომეტრაჟი მცირედით გაიზარდა, მაგრამ საინფორმაციო გამოშვებებში ახალი ამბები კვლავაც მოკლედ შუქდებოდა, ანალიტიკური და ექსკლუზიური მასალები არ მომზადებულა.

რადიომაუწყებელმა მონიტორინგის სუბიექტებს 8 საათი და 11 წუთი დაუთმო. აქედან, ყველაზე ხშირად საუბარი მთავრობასა და „ქართულ ოცნებას“ (4 სთ.), ასევე ექსპრეზიდენტ მიხეილ სააკაშვილსა და „ერთიან ნაციონალურ მოძრაობას“ (2 სთ. 12 წთ.) შეეხებოდა.

### სუბიექტების გაშუქება (%)

რადიო "ფორტუნა"


5 ივლისი - 14 ნოემბერი, 2021



რადიომაუწყებელი არც ერთი პოლიტიკური ძალის მიმართ მიკერძოებულ დამოკიდებულებას არ გამოხატავდა და სუბიექტები, ძირითადად, ნეიტრალურ ტონში შუქდებოდნენ. თუმცა, „ფორტუნა“ არც კრიტიკული ინფორმაციის გაშუქებას ერიდებოდა, რის გამოც მმართველი პარტია უფრო უარყოფითად გაშუქდა, ვიდრე დადებითად.

### სუბიექტების გაშუქება ტონის მიხედვით (%)


რადიო "ფორტუნა"  
5 ივლისი - 14 ნოემბერი



„ფორტუნას“ ფორმატი წინასაარჩევნო და შემდგომ პერიოდებში არ შეცვლილა. მიუხედავად მცირე ქრონომეტრაჟისა, ჟურნალისტები ახერხებდნენ, რომ დღის მთავარი თემები და ის საკითხები, რასაც სხვა რადიომაუწყებლები აშუქებდნენ, მსმენელამდე დაბალანსებულად მიეტანათ. ახალ ამბებში ხშირად წარმოდგენილი იყო როგორც ხელისუფლების, ასევე ოპოზიციის პოზიციები. თუმცა, ეთერში პოლიტიკოსების ხმა არ ისმოდა - ჟურნალისტები მათ კომენტარებს თვითონ ციტირებდნენ.

### სუბიექტების პირდაპირი/ირიბი გაშუქება(%)

რადიო "ფორტუნა"  
5 ივლისი - 14 ნოემბერი, 2021



2021 წლის მონიტორინგის შედეგები გვიჩვენებს, რომ რადიომაუწყებლის ეთერში პოზიტიური ცვლილებები იგრძნობა, რაც, ძირითადად, ბალანსის დაცვასა და მოვლენების შედარებით ვრცელ მიმოხილვას ეხება. თუმცა, „ფორტუნას“ საინფორმაციო გამოშვებებს კვლავაც აკლდა მოვლენების სიღრმისეული გაშუქება და ანალიზი - ახალი ამბები ზედაპირული და მშრალი იყო. აუცილებელია, ჟურნალისტებმა უფრო აქტიურად იმუშაონ, დასვან კითხვები და მსმენელამდე შეჯამებული და ამომწურავი ინფორმაციები მიიტანონ.

## რადიო „ჭერეთი“

რადიო „ჭერეთის“ ვრცელ საინფორმაციო გამოშვებებში ქვეყანაში განვითარებული მოვლენები აქტიურად შუქდებოდა. თუმცა, წინა წლებთან შედარებით, ჟურნალისტები აქცენტს თბილისში განვითარებულ პოლიტიკურ მოვლენებზე უფრო აკეთებდნენ და რეგიონული ახალი ამბებისა თუ სოციალური თემებისთვის დათმობილმა დრომ იკლო. წინა წლებთან შედარებით შემცირდა სიღრმისეული და ანალიტიკური სიუჟეტების რაოდენობაც - ახალი ამბები ზედაპირულად, ანალიზის გარეშე შუქდებოდა.

რადიომაუწყებლის საინფორმაციო გამოშვებას არასტანდარტული ქრონომეტრაჟი ჰქონდა და მისი ხანგრძლივობა ქვეყანაში განვითარებული მოვლენების შესაბამისად იცვლებოდა - ხშირ შემთხვევაში, ოპოზიციის საპროტესტო აქციები პირდაპირ ეთერში გადაიცემოდა. 27 ოქტომბერს ასევე პირდაპირ ეთერში გადაიცა „ქართული ოცნების“ წინასაარჩევნო აქციაც.


მაუწყებელმა აქტიურად გააშუქა ექსპრეზიდენტ მიხეილ სააკაშვილის პატიმრობის თემაც (სულ გაშუქებული თემების 26%) - ეთერში ყველა მხარის პოზიცია ისმოდა, თუმცა ოპოზიციის შეფასებები სჭარბობდა.

რადიო „ჭერეთმა“ მონიტორინგის სუბიექტებს 25 საათი და 27 წუთი დაუთმო. აქედან 13 საათზე მეტი მმართველი გუნდის გაშუქებაზე მოდიოდა.

### სუბიექტების გაშუქება (%)

რადიო "ჭერეთი"

5 ივლისი - 14 ნოემბერი, 2021




„ჭერეთი“ პოლიტიკური ახალი ამბების გაშუქებას დიდ დროს უთმობდა. თუმცა, ახალი ამბები პოლიტიკოსთა ოფიციალურ განცხადებებს უფრო ეფუძნებოდა, ვიდრე ჟურნალისტების მიერ მოძიებულ მასალას. მაუწყებელი ხელისუფლების აქტივობებს, უმეტესად, კრიტიკულ ჟრილში, თუმცა მიუკერძოებლად, აშუქებდა. ჟურნალისტები არც ერთი პოლიტიკური გუნდის მიმართ მკვეთრად სუბიექტურ დამოკიდებულებას არ გამოხატავდნენ. პოლიტიკოსები,

საშუალოდ 65%, ნეიტრალურად გაშუქდნენ, ხოლო მათ მიმართ გამოვლენილი უარყოფითი ტონი, ძირითადად, ოპონენტების მწვავე და კრიტიკული განცხადებების შედეგი იყო.

### სუბიექტების გაშუქება ტონის მიხედვით (%)

რადიო "ჰერეთი"

5 ივლისი - 14 ნოემბერი, 2021




საინფორმაციო გამოშვებებში ისმოდა როგორც ოპოზიციისა და ხელისუფლების, ისე არასამთავრობო სექტორის წარმომადგენელთა განცხადებები. თუმცა, ექსპრეზიდენტის პატიმრობის და მხარდასაჭერი აქციების გაშუქების დროს ბალანსი ოპოზიციის სასარგებლოდ ირღვეოდა. შესაბამისად, პირდაპირი საუბრისთვისაც ოპოზიციურ პარტიებს შედარებით მეტი დრო დაეთმოთ, ვიდრე მმართველ გუნდს.

### სუბიექტების პირდაპირი/ირიბი გაშუქება(%)

რადიო "ჰერეთი"

5 ივლისი - 14 ნოემბერი, 2021



რადიო „ჰერეთმა“ საინფორმაციო გამოშვებაში არჩევნების ორივე ტურის მიმდინარეობის პროცესი ვრცლად გააშუქა: რეგიონებიდან განხორციელდა პირდაპირი ჩართვები - საუბარი

იყო საარჩევნო უბნებთან არსებულ ვითარებასა და სავარაუდო დარღვევებზე; ეთერი დაეთმო როგორც ოპოზიციის, ისე ხელისუფლების, ადგილობრივი და უცხოური სადამკვირვებლო ორგანიზაციების წარმომადგენელთა შეფასებებს.

„ჰერეთი“ კრიტიკული რადიომაუწყებელია, რომელიც ჟურნალისტური სტანდარტების დაცვით მუშაობს. თუმცა, იმისთვის, რომ ახალი ამბების ხარისხი გაუმჯობესდეს და წინა წლებში გამოვლენილი დადებითი ტენდენციები შენარჩუნდეს, საჭიროა, მოვლენების უფრო სიღრმისეული ანალიზი და ჟურნალისტების მეტი პროაქტიულობა.

## რადიო „სამხრეთის კარიბჭე“ (ქ. ახალციხე)


რადიო „სამხრეთის კარიბჭე“ მოკლე საინფორმაციო გამოშვებებს ამზადებდა, სადაც უმეტესად სამცხე-ჯავახეთში მიმდინარე მოვლენებს შედაპირულად მიმოიხილავდნენ. ეთერში გასული ინფორმაცია, ძირითადად, მეორად წყაროებს ეყრდნობოდა, არ ჩანდა ჟურნალისტების მცდელობა მასალები თავად მოეძიებინათ და მსმენელისთვის უფრო სიღრმისეული და მრავალფეროვანი ინფორმაცია მიეწოდებინათ. მთლიანობაში, ახალი ამბების ხარისხი მაღალ სტანდარტებს ვერ აკმაყოფილებდა და ჟურნალისტების მიერ მწირი ინფორმაციის ციტირებით შემოიფარგლებოდა, საიდანაც დასკვნების გამოტანა და სიმართლის დადგენა რთული იყო. ზოგჯერ ჟურნალისტები მსმენელს მედიასამუალების ვებ-გვერდზე ამისამართებდნენ, სადაც ამა თუ იმ საკითხზე ვრცელ სტატიებსა და მეტი ინფორმაციას ჰპირდებოდნენ. თუმცა, რატომღაც ვერ ახერხებდნენ, რომ ვებ-გვერდზე უკვე დამუშავებული მასალები თავად შეეჯამებინათ და მსმენელისთვის მიეწოდებინათ.

მონიტორინგის სუბიექტებს ჯამში მხოლოდ 1 საათი და 12 წუთი დაეთმო: ამ დროის უდიდესი ნაწილი (53 წუთი) მთავრობაზე, ადგილობრივ მთავრობასა და მმართველ პარტიაზე საუბრობდნენ.

### სუბიექტების გაშუქება (%)

რადიო "სამხრეთის კარიბჭე"

5 ივლისი - 14 ნოემბერი, 2021




რადიომაუწყებელი ვერც წინასაარჩევნო პერიოდში და ვერც არჩევნების შემდგომ ვერ ახერხებდა, ადგილობრივი ახალი ამბები ვრცლად და დაბალანსებულად გაეშუქებინა. მართალია, ჟურნალისტები მიკერძოებულ დამოკიდებულებას არ გამოხატავდნენ, მაგრამ არც ფაქტების გადამოწმებას, დამატებითი მასალების მოპოვებას ცდილობდნენ და არც კრიტიკულ კითხვებს სვამდნენ, რითაც პოლიტიკოსებს საკუთარი თავის დადებითად წარმოჩენას უადვილებდნენ. ამგვარი გაშუქება ხელისუფლების დადებითი ტონის მაჩვენებლებზეც აისახა.

**სუბიექტების გაშუქება ტონის მიხედვით (%)**

რადიო "სამხრეთის კარიბჭე"

5 ივლისი - 14 ნოემბერი, 2021




„სამხრეთის კარიბჭეზე“ სუბიექტებს პირდაპირი საუბარისთვის დრო არ დათმობიათ - პოლიტიკოსების განცხადებებს წამყვანები ციტირებდნენ.

**სუბიექტების პირდაპირი/ირიბი გაშუქება(%)**

რადიო "სამხრეთის კარიბჭე"

5 ივლისი - 14 ნოემბერი, 2021



რადიომაუწყებელი მსმენელს ინფორმირებული არჩევანის გაკეთებაში ვერ დაეხმარებოდა, რადგან ვერც რეგიონულ და ვერც ცენტრალურ ახალ ამბებს ჯეროვნად ვერ აშუქებდა. გამოკვეთილი პრობლემები მწვავე და მრავალმხრივია: მოიცავს როგორც ტექნიკურ, ასევე შინაარსობრივ ხარვეზებს. ხარისხის გასაუმჯობესებლად აუცილებელია, რომ ჟურნალისტებმა


უფრო აქტიურად იმუშაონ, დასვან კითხვები, გადაამოწმონ ინფორმაცია და მსმენელამდე შეჯამებული, დაბალანსებული და ამომწურავი მასალები მიიტანონ.

## რადიო „მარნეული“

რადიო „მარნეულის“ ორენოვან (ქართულ-აზერბაიჯანული) საინფორმაციო გამოშვებებში, ძირითადად, ქვემო ქართლში განვითარებული მოვლენები შუქდებოდა, თუმცა დრო ცენტრალურ ახალ ამბებსაც ეთმობოდა. წინა წლებთან შედარებით, რადიომაუწყებლის მუშაობის ხარისხი გაუარესებულია - ახალ ამბებს კრიტიკული განხილვა მოაკლდა. მაუწყებელი მოვლენებს დაბალანსებულად და მიუკერძოებლად, თუმცა ზედაპირულად, ანალიზის გარეშე აშუქებდა. ჟურნალისტები, ძირითადად, ოფიციალურ ინფორმაციას გადმოსცემდნენ და დამატებითი მასალებისა თუ კომენტარების მოპოვებას ნაკლებად ცდილობდნენ.

რადიო „მარნეულის“ ეთერში მონიტორინგის სუბიექტებს 4 საათი და 48 წუთი დაეთმოთ. აქედან ყველაზე მეტი დრო (თითქმის 2 სთ.) ადგილობრივი მთავრობისა და მთავრობის გაშუქებაზე მოდიოდა.

**სუბიექტების გაშუქება (%)**  
**რადიო "მარნეული"**  
 5 ივლისი - 14 ნოემბერი, 2021




მონიტორინგის სუბიექტები დიდწილად (საშუალოდ, 70%) ნეიტრალურად გაშუქდნენ, რადგან მწვავე კითხვების დასმა და მოვლენების კრიტიკული განხილვა - რაც წინა წლების მონიტორინგის დროს რადიომაუწყებლის ერთ-ერთ ძლიერ მხარედ გამოვლინდა

- წლევანდელ მონიტორინგში აღარ გამოკვეთილა. უარყოფითი ტონის მიზეზი, მეტწილად, ოპონენტების მიერ გამოთქმული კრიტიკული შეფასებები იყო.

განსაკუთრებით პრობლემური ადგილობრივი ხელისუფლების აქტივობებისა და ტენდერების გაშუქება იყო, რა დროსაც ძირითადად, ოფიციალურად გამოქვეყნებულ მასალებს ციტირებდნენ და დამატებითი ინფორმაციის მოძიებასა თუ პასუხისმგებელი პირებისთვის კრიტიკული კითხვების დასმას ნაკლებად ცდილობდნენ. ამიტომაც, ხელისუფლების საქმიანობა პოზიტიურად წარმოჩინდებოდა. ხელისუფლებისთვის დაგროვილი დადებითი ტონი ზედაპირული გაშუქებით რომ აიხსნება, ამაზე ის ფაქტიც მიუთითებს, რომ იშვიათ შემთხვევებში, როდესაც ჟურნალისტები ვრცელ სიუჟეტებს ამზადებდნენ, ხელისუფლების კრიტიკას არ ერიდებოდნენ და მწვავე კითხვებსაც სვამდნენ.

### სუბიექტების გაშუქება ტონის მიხედვით (%)


რადიო "მარნეული"  
5 ივლისი - 14 ნოემბერი, 2021



სუბიექტებისთვის დათმობილი დროის, საშუალოდ, 88% ირიბ საუბარზე მოდიოდა.

### სუბიექტების პირდაპირი/ირიბი გაშუქება(%)

რადიო "მარნეული"  
5 ივლისი - 14 ნოემბერი, 2021



წინასაარჩევნო კამპანიის გაშუქების დროს ეთერში მხოლოდ კანდიდატების მიერ გაცემული დაპირებები ისმოდა. მუნიციპალური არჩევნების წინ ადგილობრივი მედიის როლი განსაკუთრებით მნიშვნელოვანია. მაღალი ხარისხის მედიაპროდუქტის შესაქმნელად



ჟურნალისტებმა მეტად პროაქტიულად უნდა იმუშაონ: ფაქტები გადაამოწმონ, მასალები გააანალიზონ, დასვან კრიტიკული კითხვები და ამით მსმენელს სიმართლის დადგენასა და კარგად გააზრებული არჩევანის მიღებაში დაეხმარონ.

## რადიო „ათინათი“ (ქ. ზუგდიდი)

რადიო „ათინათის“ საინფორმაციო გამოშვებებში სამეგრელოს რეგიონსა და ქვეყანაში მიმდინარე მოვლენები მოკლედ და ზედაპირულად შუქდებოდა. ახალი ამბები უფრო პოლიტიკურ საკითხებს მოიცავდა. შედარებით ვრცლად გაშუქდა ექსპრეზიდენტ მიხეილ სააკაშვილის დაპატიმრების თემა - პატიმრობა/შიმშილობა და სააკაშვილის მხარდასაჭერად გამართული ოპოზიციის საპროტესტო აქციების გაშუქებაზე მთლიანობაში გაშუქებული თემების 18% მოდის. ადგილობრივი სიახლეები, უმეტესად, სხვადასხვა პარტიის რეგიონული წარმომადგენლობების აქტივობებს შეეხებოდა. სოციალურ ან რეგიონისთვის/ქალაქისთვის აქტუალურ სხვა საკითხებსა და პრობლემებზე მასალები იშვიათად მზადდებოდა.


„ათინათი“ ხშირად აშუქებდა ოკუპირებულ აფხაზეთში განვითარებულ მოვლენებს, მათ შორის კოვიდ-19-თან დაკავშირებული ეპიდემიოლოგიურ მდგომარეობას.

რადიომაუწყებელმა მონიტორინგის სუბიექტებს 3 საათი და 34 წუთი დაუთმო. ყველაზე მეტად (ჯამში 2 სთ.13 წთ.) მთავრობა და „ქართული ოცნება“ გაშუქდნენ, 8 წუთი დაეთმო ადგილობრივ ხელისუფლებას.

### სუბიექტების გაშუქება (%)

რადიო "ათინათი"

5 ივლისი - 14 ნოემბერი, 2021




ახალი ამბების გაშუქებისას ბალანსი დაცული იყო და მიკერძოების შემთხვევები არ დაფიქსირებულა. თუმცა, გადაცემებს ჟურნალისტების კრიტიკული კითხვები და მოვლენების სიდრმისეული გაშუქება აკლდა. შესაბამისად, „ათინათის“ ეთერში მონიტორინგის სუბიექტები, საშუალოდ, 80% ნეიტრალურად გაშუქდნენ.

### სუბიექტების გაშუქება ტონის მიხედვით (%)

რადიო "ათინათი"

5 ივლისი - 14 ნოემბერი, 2021




პოლიტიკურ სუბიექტებს დრო პირდაპირი საუბრისთვისაც ეძლეოდათ, თუმცა, უმეტესად, მათი ირიბად (საშუალოდ 75%) გაშუქება სჭარბობდა.

### სუბიექტების პირდაპირი/ირიბი გაშუქება(%)

რადიო "ათინათი"

5 ივლისი - 14 ნოემბერი, 2021



რადიომაუწყებლის მთავარ გამოწვევად ჟურნალისტების ნაკლები პროაქტიულობა და მოვლენების სიდრმისეული, მრავალფეროვანი გაშუქება რჩება. მნიშვნელოვანია, რომ მაუწყებელმა მეტი ყურადღება მიაქციოს ადგილობრივი ხელისუფლების საქმიანობის გაშუქებას და მსმენელს რეგიონში/მუნიციპალიტეტში არსებული ვითარების და პრობლემების შესახებ ექსკლუზიური და მრავალფეროვანი ინფორმაცია მიაწოდოს.

## რადიო „ძველი ქალაქი“ (ქ. ქუთაისი)


რადიო „ძველი ქალაქი“ მოკლე, თუმცა დაბალანსებულ საინფორმაციო გამოშვებებს ამზადებდა, სადაც იმერეთის რეგიონსა და ქვეყანაში მიმდინარე მოვლენები ზედაპირულად შუქდებოდა. ჟურნალისტები არც ერთი პოლიტიკური ძალის მიმართ მიკერძოებულ დამოკიდებულებას არ ამჟღავნებდნენ. წინასაარჩევნო კამპანია მაუწყებელმა მოკლედ გააშუქა. საინფორმაციო გამოშვებებში მერობისა და მაჟორიტარობის კანდიდატების ხედვებსა და საარჩევნო პროგრამებზე დეტალური საუბარი არ ყოფილა. მონიტორინგის ბოლო პერიოდში, აქაც ისევე როგორც სხვა რადიომაუწყებლებში, ყველაზე გაშუქებადი თემა ექსპრეზიდენტ მიხეილ სააკაშვილის პატიმრობა იყო. მთლიანობაში გაშუქებული თემების 34% სააკაშვილის დაპატიმრების, შიმშილობის და მისი მხარდასაჭერი აქციების გაშუქებას დაეთმო. მსმენელს საშუალება ჰქონდა ამ საკითხების ირგვლივ განსხვავებული მოსაზრებები მოესმინა.

„ძველმა ქალაქმა“ მონიტორინგის სუბიექტებს ჯამში 4 საათი და 21 წუთი დაუთმო. აქედან 2 საათი და 26 წუთი მმართველი გუნდის გაშუქებაზე მოდიოდა, საათი და 4 წუთი გადანაწილდა „ერთიან ნაციონალურ მოძრაობასა“ და მიხეილ სააკაშვილზე.

### სუბიექტების გაშუქება(%)

რადიო "ძველი ქალაქი"


5 ივლისი - 14 ნოემბერი, 2021



რადიომაუწყებელი ახალ ამბებს მოკლედ და მშრალად გადმოსცემდა. ჟურნალისტები კითხვებს ნაკლებად სვამდნენ და პოლიტიკოსების ურთიერთსაწინააღმდეგო ზოგადი კომენტარების გაჟღერებით შემოიფარგლებოდნენ. შედეგად, „ქართულ ოცნებას“ ყველაზე მაღალი ნეგატიური ტონი დაუგროვდა.

### სუბიექტების გაშუქება ტონის მიხედვით (%)


რადიო "ძველი ქალაქი"  
5 ივლისი - 14 ნოემბერი, 2021



ახალი ამბების გაშუქებისას გადაცემის წამყვანი პოლიტიკოსებს, მეტწილად, ციტირებდა. შესაბამისად, მონიტორინგის სუბიექტების პირდაპირ საუბარს უმნიშვნელო დრო დაეთმო.

### სუბიექტების პირდაპირი/ირიბი გაშუქება(%)

რადიო "ძველი ქალაქი"  
5 ივლისი - 14 ნოემბერი, 2021



რადიოარხის ჟურნალისტები პროაქტიულობით არ გამოირჩეოდნენ და მსმენელს რეგიონში არსებული პრობლემების თაობაზე ნაკლებად ესაუბრებოდნენ. თუმცა, რამდენიმე ისეთი საკითხიც გააშუქეს, სადაც წინა პლანზე ადგილობრივი პრობლემები იყო წამოწეული და მათ შესახებ მსმენელს პასუხისმგებელი პირების პოზიციებიც გააცნეს. მსგავსი ტიპის მეტი მასალის მომზადება საინფორმაციო გამოშვებების ხარისხს მნიშვნელოვნად გაზრდიდა.

„ძველი ქალაქი“ დიდ დროს უთმობდა ქუჩის გამოკითხვებს. მაგრამ, კონტექსტისა და დამატებითი მასალების არარსებობის გამო დასკვნების გაკეთება რთული იყო. ცალკე აღებული ქუჩის გამოკითხვები საზოგადოებაში არსებული მოსაზრებების წარმოსაჩენად საკმარისი არ არის და შესაძლოა მოსახლეობის პოზიციების შესახებ არასწორი ან

ილუზორული წარმოდგენა შექმნას. ქუჩის გამოკითხვების გამოყენება მხოლოდ სიუჟეტის გასამდიდრებლად არის რეკომენდებული და ახალ ამბების მთავარ თემად ვერ გამოდგება.

რადიო „ძველი ქალაქის“ მთავარ გამოწვევად კვლავაც მოვლენების სიდრმისეული გაშუქება რჩება. მნიშვნელოვანია, რომ რეგიონულმა მაუწყებელმა მეტი ყურადღება მიაქციოს ადგილობრივი ხელისუფლების საქმიანობის გაშუქებას და მსმენელს მათთვის მტკივნეულ საკითხებზე პასუხისმგებელი პირების მოსაზრებები გააცნოს.

